

**DISKURSU MAKLOK NIAN BA KONFERÉNSIA INTERNASIONAL DARUAK KONA-BA  
DISTINU TURÍSTIKU EMERJENTE SIRA**

**MINISTRU ESTADU PREZIDÉNSIA KONSELLU MINISTRUS NO MINISTRU TURIZMU,  
KOMÉRSIU NO INDÚSTRIS iha ezersísiu  
AGIO PEREIRA**



**“Turizmu ba Pás, Armonia no Fraternidade: Dezenvolvimentu  
Turizmu Relijiozu no Peregrinasau”**

**Loron 17 fulan-maiu tinan 2019**

Exelénsia sira  
Señora no Señor sira

Maluk Partisipante sira,

Ba dala-uluk, ha'u, lori Sua Exelénsia Primeiru-Ministru nia naran, hakarak agradese ba konvite atu partisipa iha konferénsia ida-ne'e. Primeiru-Ministru labele mai, tanba ne'e nia husu mai ha'u atu representa nia, hodi hato'o votu susesu nian ba Konferénsia Internasionál daruak kona-ba Destinu Turístiku Emerjente sira ida-ne'e.

Hanesan Ministru Turizmu, Komérsiu no Indústria iha ezersísiu, ha'u agradese ba Institutu Teknolojia Dili – DIT no ba USAID, tanba organiza ona eventua importante ida-ne'ebé maka sei permite ita atu fahe esperiéncia no hetan koñesimentu kona-ba rumu husi turizmu iha Timor-Leste, no liuliu turizmu relijiozu, no ninia relasaun no potenciál kontributu ba dezenvolvimentu no kreximentu sósio-ekonómiku ba ita-nia país ne'e.

Maske Timor-Leste nu'udar país ki'ik ida, país ne'e sente orgullu ho ninia diversidade kulturál ne'ebé mai husi influénsia barak durante tempu naruk. Nune'e, grupu étniku oioin, prodús diversidade únika, ne'ebé representa husi língua, dansa, múzika, arkitetura, artezanatu no to'o ba ita-nia fiar sira. Ita nu'udar Povu ida ho tradisaun ne'ebé maikedas husi tempu beiala sira nian no fiar ba lulik sira ne'ebé sai nu'udar parte importante ida husi kultura timoroan nian, no ne'ebé tuirmai asosia ba eransa koloniál portugés, ho fiar sarani no lian portugés, no resente liután, ba ita-nia istória rezisténcia nian, luta libertasaun nasional nian.

Señora no señor sira,

Ho buat hirak-ne'e hotu, ita hanesan illa sorin ida ho istória no kultura únika.

No ha'u la bele ko'alia kona-ba dezenvolvimentu turizmu nasional, sein temi infraestrutura sira husi apoiu nian no importáncia hadi'a servisu báziku sira tur padraun sira internasionál nian, hodi investe maka'as liu iha edukasaun atu fó servisu ba área ida-ne'e la'ós de'it ba iha nivel ensinu superiór maibé liuliu ba nivel ensinu vokasionál.

Tanba ne'e , tenke investe duni ba ita-nia foin-sa'e sira, hodi asegura formasaun téknika no ne'ebé orienta ba atividade turístika oioin, hanesan kazu turizmu relijiozu nian.

Ita la halo limitasaun barak ba turista sira atu tama mai, ho exesaun atu hetan vistu, ita nu'udar nasaun ida ne'ebé iha índise ki'ik mós kona-ba kriminalidade iha rejiaun ne'e, ita iha ambiente naturál no kulturál ida ne'ebé hetan rekoñesimentu internasionál nu'udar valór akrexentadu ida ba ita-nia oferta turizmu nian.

Maibé iha buat barak mós mak ita tenke halo kona-ba asesibilidade, tantu ba transporte aéreu sira ka ba mós asesu via terrestre ba pontu turístiku sira hotu, liuliu, iha área rurál sira. Asesu ba teknolojia no informasaun sira, internet no rede movel

nian dí'ak ba daudaun, maibé sei iha mós dezafiu barak ba operadór turístiku no ba servisu sira einjerál. Governu Konstitusionál VIII sei kontinua serbisu maka'as hodi hadi'a asesibilidade sira no kontinua investe nafatin iha área hirak ne'e.

Señór no señora sira,

Turizmu relijiozu mosu atu fó ksolok espirituál. Maibé, bainhira ema halo peregrinasaun, turizmu relijiozu bele mós tanba razaun sira kona-ba orden kulturál ka antropolójika nian no nu'udar segmentu turizmu nian importante ida, ne'ebé kuaze atu hanesan ho turizmu kulturál, liuhusi hala'o vizita ba patrimóniu artístiku, istóriu no kulturál. Maibé, turizmu relijiozu la hanesan ho turizmu kulturál tanba inklui vizita ba fatin kultu nian ka partisipasaun iha eventu relijiozu sira, nu'udar ezemplu maka peregrinasaun relijioza sira ba Santuáriu Maria Virjen nian iha Ramelau. Maibé, aleinde comunidade katólíka sira, Timor-Leste mós iha priviléjiu tanba iha mós comunidade relijioza sira seluk, hanesan protestante, musulmana, kristaun, indú no konfisaun relijioza sira seluk tan, ne'ebé sei kontribui, ho ativu, ba dezvoltimentu no promosaun fatin kultu, edifisiu sira no ninia sasán sira ne'ebé lulik.

Maioria hosi turista sira ne'ebé vizita fatin relijiozu sira halo parte mós iha programa kulturál sira. Nune'e, importante atu serbisu iha programa kona-ba atu hatene fatin relijiozu nian, tantu ba turista fiar-na'in sira ka turista peregrinu sira ka turista komún sira. Programa sira-ne'e sei permite mós vizitante sira atu hatene fatin no signifíkadu husi espresaun relijioza nian sira.

Objetivu seluk hosi tipu turizmu ne'e mak atu promove diálogu entre ema no kultura hodi bele sustenta iha turizmu ida solidáriu hodi apoia dezvoltimentu sustentavel ba comunidade lokál sira. Ida-ne'e sai hanesan ferramenta ida-ne'ebé permite diálogu entre kultura no relijiaun, liuhusi koñesimentu prátika, krensa/fiar no rituál sira, hodi promove toleránsia no fraternidade entre povu sira.

Tanba ne'e, importante estabeselese iniciativa, estratéjia no ekipamentu komplementár sira ne'ebé bele esplika arkitetura no arte iha komponente hotu-hotu: funsionál, litúrjika no simbólíka sira.

Exelénsia

Señór no señora sira

Governu hatudu ona prova sira hosi nia esforsu maka'as ba iha área emerjente ida-ne'e, iha nivel globál, turizmu nian, bainhira estabeselese, iha Planu Estratéjiku Dezvoltimentu nian ba períodu tinan 2011 to'o 2030, katak turizmu relijiozu nu'udar objetivu prioritáriu ida mós hosi Polítika Nasionál Turizmu nian.

Konferénsia Internasionál dahuluk kona-ba Destinu Turístiku Emerjente sira, ho ninia tema "Dezafiu no Biban sira", iha tinan 2016, importante tebes hodi konkretiza Polítika Nasionál Turizmu nian, ne'ebé aprova ona iha fulan-marsu tinan 2017, ho objetivu "Hamoris turizmu too tinan 2030: hakbiit identidade nasional".

Tanba ne'e, ha'u haksolok ho prezensa husi ilustre orador, nasional no internasionál sira iha Konferénsia daruak kona-ba "Turizmu ba Pás, Armonia no Fraternidade: Dezenvolvimentu Turizmu Relijiozu no Peregrinasaun", liuliu ba sira ne'ebé maihusi dook. Lori Governu Timor-Leste nia naran, ha'u agradese ba ita-nia prezensa no disponibilidade hodi kontinua la'o hamutuk ho ami ho hanoin atu lori Timor-Leste sai destinu turístiku exelénsia nian ida.

Ha'u hanoin ema hotu sei konkorda katak Timor-Leste kontinua kria oportunidade barak no, nune'e mós, dezafiu sira. Oportunidade sira atu hatene oinsá aproveita esperiénsia no kapitál rejaun nian, tanba jeografikamente ita halo parte ba Sudeste Aziátiku, no dezafiu sira, tanba ita tenke investe ho sériu iha ita-nia rekursus umanus no iha dezenvolvimentu infraestruturas atu nune'e ita bele kompete ho viziñu sira iha rejaun ne'e, hodi kria segmentu sira merkadu nian ne'ebé bele dada investmentu no negósiu, ne'ebé importante tebes ba ita-nia diversifikasaun ekonómika.

Lori Governu nia naran, ha'u fó ami-nia votu susesu boot iha konferénsia ida ne'e.

Obrigada barak.